

綱
公
序

御批

鳳洲網鑑



歷朝綱鑑會纂序

史者一代之成書實萬禩之公
論公論者善其善惡其惡是是
非非一定之衡也一代書成而
公論不盡歸之龍門茂林曠世

鉅筆說者譏其記繁而志寡要
其書之堅潔整贍有非蔚宗所
逮者下此惟廬陵五代史凌爍
古今子瞻猶短其作傳有漏况
十九史紛紛籍籍文成而義不

屬者黷邪稽古史卽經也尙書
之文是也自堯典至秦誓世數
缺有間矣孔子刪之曰式訓來
世文不必備云爾周衰孔子從
平王四十九年值隱公元年作

春秋本魯史也魯前此無史乎
筆削訖二百四十二年蓋聖人
若是其慎也況春秋未作暨絕
筆之後列國非無記注自日尋
干戈若存若亡迄於秦火遂茫

不可跡而春秋焰而猶存此誠
大聖人公論不可滅故史也而
尊曰經與尚書竝傳云自秦以
來大義蔑如迄宋涑水司馬光
輯資治通鑑歷十九年而成書

起周威烈王戊寅二十三年訖
五代其中自周敬王庚申至威
烈王戊寅七十餘年不續蓋獲

麟以後不復有作者涑水以意
承之而義不敢當故闕如也考

亭朱子熹因通鑑爲綱目黜魏
帝漢義例嚴正真是非不謬於
聖人善乎劉永新之言曰尙書
言紀傳春秋著編年溫公取尙
書之紀傳史約之以爲編年通

鑑而文公倣春秋大書以爲之
綱三傳分註以爲之目通鑑綱
目是爲尙書春秋之子孫者審
此則公論久定讀史家舍通鑑
綱目其孰從而求之惟時爲涑

水所辟有京兆劉恕著通鑑外
紀起三皇迄周共和厥後有蘭
溪金履祥著通鑑前編起陶唐
止威烈京兆爲蘭溪所譏刺以
自堯而上輕信百家併可傳者

悉削不錄此則太古載記無繇
聞知於史之體蓋闕焉後此如
宋丹稜李燾有續資治通鑑元
明州陳桎有通鑑續編我明淳
安商輅有續編宋元綱目是皆

有以足涑水考亭所不逮余生

也晚竊有志於史學於是綜集

歷史削繁就簡辨誣存真而一

以涑水通鑑考亭綱目爲歸前

乎威烈採之京兆蘭溪補其缺

後乎五代因之丹稜明州淳安
續其終大要以綱爲主而鑑與
目爲附紀與編其前列者也搜
討叅訂羣書悉攷勒成一編名
曰綱鑑會纂誌備也嗚呼通鑑

綱目不作則尙書春秋之旨漸
微習春秋者進而通乎尙書習
尙書春秋者推而及於綱鑑讀
綱鑑者邈而歸於尙書春秋自
古迄今帝王卿相聖賢愚不肖

袞鉞較著公論不移其爲義也
廼足以立治非治治也治亂也
請以是編爲涑水考亭之首庸
也可至史斷之辭濫不收美不
遺期於詳確而止管窺問附當

更俟諸公論焉

瑯琊鳳洲王世貞撰

